



## INTRODUCZIUN

DA FLURINA CAVEGN-TOMASCHETT

*Aschia sco ils evangelis dallas davosas dumengias raquenta era quel dad oz digl esser sin viadi da Jesus e ses giuvnals viers Jerusalem. Il viagiar communabel porscha ina buna caschun da vegnir in cun l'auter el discuors. Aschia ei Jesus era vegnius confruntaus cun la damonda, cons che vegnien sprindrai, q.v.d. cons che hagein access al reginavel da Diu. Jesus dat buc ina risposta exacta, el patratga en outras categorias. El animescha in e scadin da sestentar per haver access al reginavel da Diu. Per visualisar igl access sesurvescha el dil maletg dalla porta: sco emprem d'ina porta stretga, lu dad ina serrada. Igl esser staus sin viadi ensemen cun Jesus ed igl esser sesius cun el a meisa dat negina garanzia per entrar.*

*Las respostas da Jesus lain sentir, ch'ei regia in niev uorden el reginavel da Diu, en mintga cass in auter che quel dil mund. Quei semuossa oravontut en l'explicaziun, ch'ils davos vegnien ad esser ils emprems. Jesus drova cheu plaid ualti detscharts, el pren negin risguard sin sensibladads. Sia instrucziun selai buca metter el truchet dalla pedagogia da gnocheragnar (Kuschelpädagogik).*

## EVANGELI

Lc 13,22–30

<sup>22</sup>Sin viadi viers Jerusalem eis el ius a perdegond per vitgs e marcaus. <sup>23</sup>Cheu ha enzatgi detg ad el: Segner, vegnan mo paucs spindrai? El ha rispundiu ad els: <sup>24</sup>Fagei tut sforz d'entrar dalla porta stretga, pertgei jeu ditgel a vus, biars vegnan ad empruar d'entrar, mo reusseschan buc.

<sup>25</sup>Inaga ch'il patrun-casa ei levas en pei ed ha serrau la porta, vegnis vus a star dadora e spluntar vid la porta e dir: Segner, arva a nus! Ed el vegn a risponder a vus: Jeu sai buca danunder che vus essas.

<sup>26</sup>Lu vegnis vus a dir: Nus vein buiu e magliau en tia preschientscha, e ti has instruiu nus sin vias e plazzas. <sup>27</sup>Mo el vegn a dir a vus: Jeu sai buca danunder che vus essas; naven da mei, tut vus malfatschents!

<sup>28</sup>Ei vegn ad esser bargir e sgriziar ils dents, cura che vus veseis Abraham, Isac e Jacob e tut ils profets el reginavel da Diu, mo vusezs catschai giuado. <sup>29</sup>Ed ei vegnan digl Orient e digl Occident, dil Nord e dil Sid, e vegnan a semetter a meisa el reginavel da Diu. <sup>30</sup>Ed uarda, entgins dils davos vegnan ad esser ils emprems, ed entgins dils emprems vegnan ad esser ils davos.